

Ademas di 2 siman di prison condicional

Booshi Wever prohibi pa tacha bon number di señor Rudy Lampe pa 3 año

ORANJESTAD - Manera a publica, ayera mainta Hues a dicta sentencia den e caso penal cu Ministerio Publico a cuminsa contra Parlamentario Booshi Wever.

Redactor di casonan di Corte tabata presente den sala di Corte y por a constata cu señor Booshi Wever no a presenta mientras cu su abogado tabata presente pero sinta patras den tribuna. Pone e nota e abogado mr. Flanegin bisti cu su toga y tambe por a mira señor Rudy Lampe. Den tribuna di sala di Corte por a mira algun simpatizante di e partido di señor Lampe.

A TACHA BON NUMBER Y HONOR DI LAMPE

Hues a bisa cu e ta haya cu señor Wever a tacha e bon

number y honor di señor Lampe. Hues a cuestiona e hecho cu señor Wever a haci uzo di su derecho di silencio. Hues ta haya cu door di esaki, señor Wever no kier of no por a declara kico tabata e motibonan of circunstancianan pa cual por compronde cu un biaha señor Lampe lo a haci su mes culpabel na pedofile.

Hues a rechasa e defensa mr. Ruiz su punto di bista esta cu señor Wever no tabatin intencion di tacha e bon number y honor di señor Lampe cu su expresionnan pero kier a alerta comunidad di Aruba pa personanan manera señor Lampe.

VIOLA DERECHO DI EXPRESION LIBER

Tambe Hues a rechasa e ponencia cu señor Wever a haci uso di su derecho di expresion liber. Hues ta muestra cu señor Wever cu e expresionnan no funda, a viola seriamente e derecho di expresion liber y cu door di esey el a cay den e margen di ley penal pa tacha bon number y honor di un persona.

MESTER A ATENDE SU MES COMO POLITICO

Hues a sigui bisa cu si hasta mester bay tras di e ponencia di señor Wever cu e mester a defende su mes contra e acusacionnan penal di señor Lampe, den casonan asina na opinion di Corte den e cultura politico Arubano no tin espacio pa haci expresionnan no funda.

DAÑA NUMBER Y HONOR DI PASTOR Y POLITICO

Hues ta haya cu señor Wever no solamente a tacha e number y honor di señor Lampe como persona sino tambe su funcion como pastoor Catolico y politico. E expresionnan di señor Wever, como un politico hopi conoci, a wordo haci hustamente den un comunidad catolico chikito. Hues ta haya cu señor Wever a comporta su mes hopi malo den comunidad pa cu señor Lampe.

STOP DI DAÑA NUMBER DI SEÑOR LAMPE

Hues a bisa cu e castigo cu e ta impone ta hustamente pa stimula señor Wever no haci tipo di expresionnan asina

mas den direccion di señor Lampe.

Hues a rechaza e demanda di 50 mil florin di daño cu señor Lampe a demanda pasobra na opinion di Hues den un caso penal no ta facil pa determina e magnitud di e suma cu lo mester paga como daño. Hues ta kere cu señor Lampe lo por cuminsa un caso civil pa logra esaki. Hues su sentencia ta cu e ta condena Wever na 2 siman condicional di prison cu un tempo di prueba di 3 año. Como condicion special manera na e tempo di prueba aki, Hues a ordena señor Wever pa abstene di haci expresionnan di e indole ariba menciona den direccion di Lampe o sea cu Hues ta prohibi señor Wever pa yama señor Lampe pa pedofile.